

Gratias etiam ago pro 4 Insecta ista rarissima; utinam mittere posses Muscam (Culicem), quæ occidit boves, de qua scripsisti quondam.

Opto vivere in proximam æstatem, quo Te coram videam; interea vive felix et multos procrea auditores, qui naturæ delicias in pretio habeant.

Hispa ista nigra thorace rubro pulcherrimum fuit sane Insectum.

Vive felix et me, ut soles, amare perge.

Upsaliæ 1770 d. 9. Novembris.

Viro celeberrimo D. D. Brunnichio Professori Haffniensi
Haffniæ

(9) Viro Celeberrimo
D. D. Brunnichio
Professori Reg. Haffniensi
s. pl. d.

Car. à Linné

Accepi rite cum D. Gisekio Tua Animalium Genera a pag. 1 ad 16 pulcherrime sane delineata et amplissimis vocabulis enunciata, e quibus pleraque rite dignosco; opto magnopere videre sequentia, quæ ut mittas oro quæsoque, cum opus vix perveniat ad nostros bibliopolas; libri enim Danorum apud nos rarissime occurrunt.

Ex his abunde video quam solide Tu V. C. apud Tuos excitabis studium naturæ, quod tam paucos habuit veros Doctores, cum interim nullum studium majus, nullum jucundius.

Optavi diu Te coram videre, Tecum confabulari de scientia quam ambo in deliciis habemus; sed frustra hæc vota. Te Tua fata, quæ opto semper Tibi propitia, detinent.

Vive felix diutissime et esto divini numinis præco.

Dabam Upsaliæ 1771 d. 24 Decembris.

Viro celeberrimo D. D. M. T. Brunnichio in acad. Haffn.
Professori Clarissimo Haffniæ.